

gons, masle & femelle, entrelacez comme d'un nœud par le milieu du corps, avec reflexion circulaire de leurs parties anterieures, & comme se baisans l'un l'autre. De ces deux dragons adioints & attachez à la verge de Mercure on rend ceste raison : à sçauoir, qu'une fois Mercure allant en Arcadie, trouua en son chemin deux dragons couplez ensemble & combattans l'un contre l'autre, & lors il mit sa verge entre-deux, qui fut occasion qu'ils se separerent & cesserent de combattre. De ce est adueni que ceste verge Mercuriale accoustree avec ces deux dragons, a esté par apres prise pour verge de paix & pacification : dont les Ambassadeurs & pacificateurs portoyent anciennement caducees & verges semblables, à l'imitation & exemple de Mercure. Mesme les Romains annonçoient & commençoient la guerre par les Feciaux, qu'ils appelloient *Feciales*, & la finissoient par Caduceateurs, c'est à dire, ambassadeurs de paix. En outre, pource que vnion & concorde entre citoyens est cause de toute felicité & prosperité, vous voyez au reuers des medalles Imperiales, Felicité, tenant en l'une des mains vn caducee & verge Mercuriale, comme ceste-cy, avec inscription *Felicitas Augusti, Felicitas seculi, Felicitas temporum, &c.* De ce que dit est sera aisé à entendre, pourquoy & comment le Caducee de Mercure denote & signifie concorde & felicité.

6.

Le sixieme portrait de ceste planche, est le reuers d'une medalle d'argent Consulaire, avec l'inscription de Leca. Pour l'intelligence duquel est à noter que Porcius Leca fut autheur de la loy Porcia, ainsi nommee de luy qui estoit de la gent & nom des citoyens Romains qui furent dits Porcij, comme Porcius Cato, & autres. Ceste loy Porcia defendoit de faire mourir vn citoyen Romain, sans estre ouy & sans qu'il eust defendu sa cause. Icy se voit le Magistrat, que i'estime estre vn Tribun militaire, si on prend garde à l'habit, lequel est accosté de son viateur & sergent tenant la verge en sa main, laquelle est indice de son estat & office, qui estoit d'appeller & faire venir les gens au commandement de son maistre. Le Tribun met la main sur la teste du troisieme personnage que vous voyez icy empreint, duquel vient ce mot apposé tout au deffous, *Prouoco*, c'est à dire, l'en appelle. Prouocation estoit appel ou appellation d'un moindre à un plus grand, à un plus haut Magistrat ou Iuge superieur, avec imploration de son aide & secours. Mais il vaut mieux mettre le passage qu'Aulus Gellius a retiré du 21. liure des choses humaines de Marc Varron, à sçauoir : Des Magistrats les

La loy Porcia.

Prouocation.

k.j.